



Lajmëtari i Radio Marisë

Shkurt 2013

Viti V, Nr. 2

KUSHTIMI I KRISHTIT

Që nga kohët e lashta, e krenjtja e Kushtimit të Jezu Krishtit në Tempull ka në vetvete shenjën e «takimit». Takohen së bashku Shëlbuesi dhe populli i tij, përmes dritës së popujve, që e paraqet qiriu që bekohet në atë ditë dhe mbartet në procesion krenor, ashtu që pastaj besimtarët ta marrin në shtëpi dhe kjo dritë ta përcjellë jetën e tyre që nga lindja e deri në vdekje. Në ditën e Kushtimit të Zotit e nderojmë Shëlbuesin si «shenjë të cilën njerëzit do ta kundërshtojnë», por e cila nuk mund të tejkalohet në udhën e shëlbimit, sepse është vendosur «për ngritje dhe rrenim». Në ditën e Kushtimit të Zotit kremtojmë takimin e Hyjit me besimtarët e tij, që e presin shumë gjatë dhe me durim të madh, takim që në çastin e caktuar i plotëson të gjitha pritjet dhe durimin e mundimshëm. Kështu Simoni plak ka mundësi ta këndojë këngën, që në mënyrë shekullore jehon në lutjen e Liturgjisë së orëve: «Tani, o Zot, mund të lejosh të vdesë shërbëtori yt në paqe siç the ti vetë, sepse me sytë e mi e pashë shëlbimin që ti e bërë gati në sy të të gjithë popujve: Dritën që bën të të njohin Ty paganët e që i jep nder popullit tënd, Izraelit» (Lk 2, 29-32).

Takimin e Hyjit me Anën e vjetër dhe të përsipirshme, që gjatë shumë viteve me lutje dhe shërbim kërkon që të plotësohen premtimet e Hyjit, e drejton Shpirti Shenjt, sepse vjen në çastin e duhur në Tempull që ta përjetojë dritën e kësaj jete të gjatë të pritjes, të heshtjes dhe të durimit, jetën që e kaloi me fe të qëndrueshme.

Ky është takimi i të gjitha breznive me Fëmijën, të cilin e sjell dhe e kushton Nëna e re, të cilën e përcjell Jozefi, kujdestari që vetëflijohet në mënyrë heroike dhe të heshtur duke kryer planin hyjnor. Ky është takimi i Shëlbuesit me brezin e «përjashtuar», siç konsideroheshin Simoni dhe Ana.

Edhe kësaj here kemi mundësi të shohim qartësinë e ndërhyrjes së Hyjit dhe vlerën e qëndrueshmërisë, që themelohet në virtytin e lutjes. Duket se për këtë virtyt, sot, kemi nevojë më shumë se për çdo gjë tjetër, sepse po iu nënshtrohemi gjithnjë e më shumë tundimeve të forta, para të cilave kemi nevojë gjithnjë e më shumë ta forcojmë besimin tonë në vizitën e Hyjit dhe vlerën e kushtimit.

Kushtimi i Krishtit është ardhja e dritës së Hyjit në historinë tonë të errësuar, është pengu se Hyji udhëton me popullin e vet në të gjitha tunelet e historisë plot errësirë. Prandaj, e kemi nevojshme ta bëjmë kthimin e madh në mendime, shkrime dhe besim, që jeta jonë të shndërrohet në mësimin e frytshmërisë që ka pritja e ndërhyrjes së ditës së Hyjit edhe pranë të gjitha errësirave të mundshme që ka kjo botë.



Ndjejme nevojën që ta ndryshojmë jetën duke mohuar të gjitha privilegjet që na i dhuron bota ose njerëzit e rëndësishëm në të. Duhet pranuar «shenja e kundërshtimit» që sjell paqen dhe gëzimin e fillimit të ri. Kjo lutje le ta shndritë secilin prej nesh dhe të gjithë ata që në mënyrë të sinqertë e kërkojnë Hyjin:

Më drejto, o Dritë e butë në errësirën që më rrethon;
nata është e errët, e unë jam larg nga vatra ime.
Nuk po të kërkoj që t'i shoh horizontet e largëta,
Më mjafton që të shoh hapin që bëj.
Më drejto, pra, o Dritë e butë.

Dhe drita le të na drejtojë hap pas hapi deri te plotësia e Dritës, që çdo ditë të kemi mundësi të kalojmë nga hijet e kësaj bote në dritë. Mirëpo, kjo gjë do të realizohet gjatë kësaj jete tokësore çdo ditë e më shumë, aq sa ne hapemi përpara Krishtit dhe Fjalës së tij.

Kjo është udha jonë për çdo ditë, hap pas hapi, me lutje dhe me punë. Të gjitha tunelet do t'i kalojmë me Dritën e Hyjit. Prandaj, në ditën e Kushtimit të Zotit në Tempull ta marrim Dritën dhe të bëjmë të ndriçojë në pishtarin e jetës sonë, që t'i shndrisë të gjitha çastet, jo vetëm disa ditë dhe festa të shënuara, deri në çastin e vdekjes. Le të na përcjellë në këtë jetë dhe le të na shndrisë Drita e Krishtit dhe ndërmjetësimi i Asaj që sot dëgjojmë për dhimbjet që do të jenë shëlbimiprurëse për shumë njerëz që do ta pranojnë vuajtjen si rrugë drejt lavdisë dhe gëzimit.

Don Preka

**Në këtë numër
do të lexoni:**

Porosia e Atit të Shenjtë
për Ditën Botërore të Rinisë, 2013

Vullnetare e Radio Marisë - Përgjigje dashurie
- nga Rosela dhe Antonio

fq. 2-3 Përrurimi i Radio Marisë
në Kosovë

fq. 3

fq. 4

POROSIA E ATIT TË SHENJTË PËR DITËN BOTËRORE TË RINISË NË BRAZIL, 2013

...vijon nga numri i kaluar.

4. Shkoni në të gjithë popujt

Krishti i ngjallur i ka dërguar nxënësit e tij për ta dëshmuar praninë e tij shëlbuese për të gjithë popujt, pasi Hyji, në dashurinë e vet tejet të madhe, dëshiron që të gjithë njerëzit të shëlbohen dhe që askush të mos birret. Me flijimin e dashurisë së Kryqit, Jezusi ka hapur rrugën derisa çdo burrë e çdo grua të mund ta njohë Hyjin dhe të hyjë në një bashkim dashurie me Të. Dhe Ai ka themeluar një bashkësi nxënësish për ta çuar shpalljen e shëlbimit të Ungjillit deri në skajet e botës, që ai t'i mbërrijë burrat dhe gratë e çdo vendi dhe çdo kohe. Le ta bëjmë tonën këtë dëshirë të Hyjit!

Të dashur miq, hidhini sytë përreth e shikoni shumë të rinj e kanë humbur kuptimin e ekzistencës së tyre. Shkoni! Krishti ka nevojë edhe për ju. Lëreni veten të drejtoheni nga dashuria e tij, jini instrumente të kësaj dashurie të pafundme, që ajo t'u shkojë të gjithëve, veçanërisht atyre "që janë larg". Disa janë larg gjeografikisht, të tjerët përkundrazi janë larg pasi kultura e tyre nuk i lejon hapësirë Hyjit; disa nuk e kanë pranuar ende Ungjillin personalisht, të tjerët, edhe pse e kanë marrë, e jetojnë sikur Hyji të mos ekzistonte. Të gjithëve ua hapim derën e zemrës tonë; kërkojmë të hyjmë në dialog, me thjeshtësi dhe me respekt: ky dialog, nëse jetohej në një miqësi të vërtetë, do të japë fryt. "Popujt", te të cilët jemi dërguar, nuk janë vetëm vendet e tjera të botës, por edhe mjediset e ndryshme të jetës: familja, lagjia, vendet e studimit dhe punës, grupet e miqve dhe vendet e kohës së lirë. Shpallja e gëzueshme e Ungjillit iu drejtohet të gjitha mjedisëve të jetës tonë, pa asnjë kufizim.

Dua të nënvizoj dy fusha ku angazhimi juaj misionar duhet të jetë edhe më i vëmendshëm. I pari është ai i komunikimeve shoqërore, në veçanti bota e *internetit*. Ashtu siç kam pasur mundësinë t'ju them, të dashur të rinj, "ndihuni të angazhuar për ta futur në kulturën e këtij mjedisi të ri komunikues dhe informues vlerat mbi të cilat mbështetet jeta juaj! [...] Juve, të rinj, që thuajse në mënyrë të vetvetishme gjendeni në sintoni me këto mjete të reja të komunikimit, ju takon në mënyrë të veçantë detyra e ungjillëzimit të këtij "kontinenti dixhital". Mësoni, pra, ta përdorni me urti këtë mjet, duke marrë parasysh edhe kurthet që ai i përmban, sidomos rrezikun e varësisë, të përzjerjes së botës reale me atë virtuale, të zëvendësimit të takimit dhe dialogut të drejtpërdrejtë me njerëzit me kontaktimet në rrjet.

Mjedisi i dytë është ai i lëvizjes. Sot ka gjithmonë e më shumë të rinj që udhëtojnë, qoftë për arsye studimi ose pune, qoftë për argëtim. Por, mendoj këtu edhe për të gjitha lëvizjet migruese, me të cilat miliona njerëz,

shpesh të rinj, zhvendosen dhe ndërrojnë qytet ose vend për arsye ekonomike ose shoqërore. Edhe këto fenomene mund të bëhen raste provanore për përhapjen e Ungjillit. Të dashur të rinj, mos kini frikë ta dëshmoni fenë tuaj edhe në këto kontekste: është një dhuratë e çmuar për këdo që takoni që t'ia komunikoni gëzimin e takimit me Krishtin.



5. Bëni nxënës!

Mendoj se e keni provuar shumë herë vështirësinë për t'i përfshirë moshatarët tuaj në përvojën e fesë. Shpesh do ta keni konstatuar se si në shumë të rinj, sidomos në disa faza të ecjes së jetës, ekziston dëshira për ta njohur Krishtin dhe për t'i jetuar vlerat e Ungjillit, por kjo shoqërohet nga ndjenja se janë të papërshtatshëm e të paaftë. Çfarë të bëni? Para së gjithash, afërsia juaj dhe dëshmia juaj e thjeshtë do të jenë një kanal përmes të cilit Hyji do të mund ta prekë zemrën e tyre. Shpallja e Krishtit nuk kalon vetëm përmes fjalëve, por duhet ta përfshijë të gjithë jetën dhe të përkthehet në gjeeste dashurie. Të qenit ungjillëzues lind nga dashuria që Krishti e ka futur brenda nesh; kështu, dashuria jonë duhet t'i përshtatet gjithmonë e më shumë dashurisë së Tij. Si Samaritani i mirë, ne duhet të jemi gjithmonë të vëmendshëm ndaj kujt do që takojmë, të dimë të dëgjojmë, të kuptojmë, të ndihmojmë, për ta drejtuar këdo që është në kërkim të të vërtetës dhe të kuptimit të jetës në shtëpinë e Hyjit, që është Kisha, ku ka shpresë dhe shëlbim (krh. Lk 10,29-37).

Të dashur miq, mos e harroni kurrë se vepra e parë e dashurisë që mund ta bëni ndaj të afërmit është bashkëndarja e burimit të shpresës tonë: kush nuk e jep Hyjin, jep shumë pak! Apostujve të vet Jezusi iu urdhëron: "Bëjini nxënës të mi të gjithë popujt! Pagëzoni në Emër të Atit e të Birit e të Shpirtit Shenjt! Mësojini të zbatojnë gjithçka ju kam urdhëruar!" (Mt 28,19-20). Mjetet që kemi për "të bërë nxënës" janë më së pari Pagëzimi dhe katekeza. Kjo do të thotë se duhet t'i drejtojmë personat që po ungjillëzojmë kah takimi me Krishtin e gjallë, në

mënyrë të veçantë në Fjalën e tij dhe në Sakramentet: kështu do të besojnë në Të, do ta njohin Hyjin dhe do të jetojnë nga hiri i Tij. Do të doja që secili ta pyeste veten: a e kam pasur ndonjëherë guximin që t'ia propozoj Pagëzimin të rinjve që nuk e kanë marrë ende? A e kam ftuar ndokënd që ta ndjekë një ecje zbulimi të fesë së krishterë? Të dashur miq, mos druani t'ia propozoni bashkëmoshatarëve tuaj takimin me Krishtin. Thirrni Shpirtin Shenjt: Ai do t'ju udhëheqë për të hyrë gjithmonë e më shumë në njohjen e dashurisë së Krishtit dhe do t'ju bëjë krijues në transmetimin e Ungjillit.

6. Të fortë në fe

Përballë vështirësive të misionit të ungjillëzimit, nganjëherë do të tundoheni të thoni si Jeremia profet: «Eheu, o Zot Hyj! Po, unë nuk di të flas, sepse jam fëmijë!». Por edhe juve Hyji ju përgjigjet: «Mos thuaj: "jam fëmijë". Por shko te të gjithë ata që do të të dërgojnë» (Jer 1,6-7). Kur ndiheni të papërshtatshëm, të paaftë, të dobët për ta shpallur dhe dëshmuar fenë, mos kini droje. Ungjillëzimi nuk është nisëm e jona dhe nuk varet para së gjithash nga talentet tona, por është një përgjigje plot besim dhe e bindur ndaj thirrjes së Hyjit, dhe, prandaj, bazohet jo në forcën tonë, por në forcën e tij. E ka provuar Pali apostull që thotë: "Por ne e mbajmë këtë visar në enë argjile, që kjo fuqi e pakrahësueshme të shihet se është e Hyjit e jo prej nesh" (2 Kor 4,7). Prandaj, ju ftoj që të rrenjoseni në lutje dhe në Sakramente. Ungjillëzimi i vërtetë lind gjithmonë nga lutja dhe mbahet nga ajo: duhet më parë të flasim me Hyjin që të mund të flasim për Hyjin.

Dhe në lutje, ia besojmë Zotit njerëzit te të cilët jemi dërguar, duke e lutur që ta prekë zemrën e tyre; i kërkojmë Shpirtit Shenjt që të na bëjë vegla të tij për shëlbimin e tyre; i kërkojmë Krishtit që t'i vendosë fjalët në buzët tona dhe të na bëjë shenja të dashurisë së tij. E, më në përgjithësi, lutemi për misionin e mbarë Kishës, sipas kërkesës së qartë të Jezusit: "Lutjuni, pra Zotërisë së të korrave, të dërgojë korrtarë në të korrat e veta" (Mt 9,38). Mësoni të gjeni në Eukaristi burimin e jetës tuaj të fesë dhe të dëshmisë tuaj të krishterë, duke marrë pjesë me besnikëri në Meshën e të dielës dhe sa herë që mundeni gjatë javës. Shkoni shpesh në Sakramentin e Pajtimit: është një takim i çmuar me mëshirën e Hyjit që na pranon, na fal dhe i përtërin zemrat tona në dashuri. E mos ngurroni ta merrni Sakramentin e Krezmimit nëse nuk e keni marrë ende, duke u përgatitur me kujdes dhe angazhim. Me Eukaristinë, ai është Sakramenti i misionit, pasi na e dhuron forcën dhe dashurinë e Shpirtit Shenjt për ta shpallur fenë pa frikë. Gjithashtu, ju nxis që ta praktikoni Adhurimin Eukaristik: qëndrimi në dëgjim dhe në dialog me Jezusin e pranishëm në Sakrament bëhet pika e nisjes së hovit të ri misionar.

Nëse do ta ndiqni këtë ecje, vetë Krishti do t'ju dhurojë aftësinë për t'i qëndruar plotësisht besnikë Fjalës së Tij dhe për ta dëshmuar atë me besnikëri dhe guxim. Shpesh do të jeni të thirrur për të dhënë prova qëndrueshmërie, veçanërisht kur Fjala e Hyjit do të ngjallë mbyllje dhe kundërshtime. Në disa vende të botës, disa prej jush jetojnë me vuajtjen se nuk mund ta dëshmojnë dot hapur fenë në Krishtin, për mungesë të lirisë fetare. E ka edhe prej atyre që tashmë e kanë paguar me jetën e vet çmimin se i përkiste Kishës. Ju jap zemër që të qëndroni të fortë në fe, të sigurt se Krishti është pranë jush në çdo provë. Ai ju përsërit: «Të lumët ju kur t'ju shajne e t'ju salvojnë dhe kur, për shkakun tim, t'i thonë të gjitha të zezat kundër jush, por në rrenë! Gëzohuni e galdoni, sepse i madh do të jetë shpërblimi juaj në qiell! Jo po, kështu i salvuan edhe profetët para jush! (Mt 5,11-12).

7. Me të gjithë Kishën

Të dashur të rinj, për të qëndruar të fortë në shpalljen e fesë së krishterë atje ku jeni dërguar, keni nevojë për Kishën. Askush nuk mund të jetë dëshmitar i Ungjillit i vetëm. Jezusi i dërgoi nxënësit e tij në mision së bashku: “bëni nxënës” është në numrin shumë. Pra, ne e ofrojmë dëshminë tonë gjithmonë si anëtarë të bashkësisë së krishterë dhe misioni ynë bëhet i frytshëm në bashkimin që e jetojmë në Kishë: nga bashkimi dhe nga dashuria që kemi njëri për tjetrin do të na njohin si nxënës të Krishtit (krh. Gjn 13,35). I jam mirënjohës Zotit për veprën e çmuar të ungjillëzimit që zhvillojnë barkësit tona të krishtera, famullitë tona, lëvizjet tona kishtarë. Frytet e këtij ungjillëzimi i përkasin të gjithë Kishës: “njëri mbjell e tjetri

kor”, thoshte Jezusi (Gjn 4,37).

Prandaj, nuk mund të mos e falënderoj Zotin për dhuratën e madhe të misionarëve, që e kushtojnë krejt jetën e vet për shpalljen e Ungjillit deri në skajet e tokës. Në të njëjtën mënyrë e bekoj Zotin për meshtarët dhe të kushtuarit, që e ofrojnë plotësisht vetveten derisa Jezu Krishti të shpallet dhe të duhet. Dëshiroj këtu t'ju jap zemër të rinjve që janë thirrur nga Hyji, të angazhohen me entuziazëm në këto thirrje: “Më i lum është ai që jep se ai që merr” (Vap 20,35). Atyre që e lënë gjithçka për ta ndjekur, Jezusi ua ka premtuar njëqindfishin dhe jetën e amshuar! (krh. Mt 19,29).

E falënderoj Hyjin edhe për të gjithë besimtarët laikë që angazhohen për ta jetuar të përditshmen e tyre si mision atje ku ndodhen, në familje apo në punë, derisa Krishti të duhet dhe të shërbehet dhe të rritet Mbretëria e Hyjit. Mendoj në mënyrë të veçantë për të gjithë ata që veprojnë në fushën e edukimit, të shëndetësisë, të sipërmarrjes, të politikës dhe të ekonomisë, si edhe në shumë mjedise të tjera të apostullatit të laikëve. Krishti ka nevojë për angazhimin dhe për dëshminë tuaj. Asgjë – as vështirësitë e as moskuptimet – të mos ju bëjë ta refuzoni dërgimin e Ungjillit të Krishtit në vendet ku gjendeni: secili prej jush është i çmuar në mozaikun e madh të ungjillëzimit!

8. «Ja ku jam, o Zot!»

Në përmbyllje, të dashur të rinj, dua t'ju ftoj ta dëgjoni në thellësinë e vetes tuaj thirrjen e Jezusit për ta shpallur Ungjillin e Tij. Siç e tregon edhe shtatorja e madhe e Krishtit Shëlbues në Rio de Zhaneiro, zemra e tij është e hapur në dashuri ndaj të gjithëve, pa dallim,

dhe krahët e tij janë të shtrirë për ta mbërritur secilin. Jini ju zemra dhe krahët e Jezusit! Shkoni ta dëshmoni dashurinë e Tij, jini misionarët e rinj të mbushur me dashuri dhe mikpritje! Ndiqeni shembullin e misionarëve të mëdhenj të Kishës, si Shën Françesk Ksaveri e shumë të tjerë.

Në mbyllje të Ditës Botërore të Rinisë në Madrid, kam bekuar disa të rinj të kontinenteve të ndryshme që niseshin në mision. Ata përfaqësonin të rinjtë e shumtë që, duke i bërë jehonë profetit Isaia, i kanë thënë Zotit: “Ja ku jam, më dërgo mua!” (Is 6,8). Kisha ka besim në ju dhe ju është thellësisht mirënjohëse për gëzimin dhe dinamizmin që sillni: përdorini talentet tuaja me bujari në shërbim të shpalljes së Ungjillit! E dimë se Shpirti Shenjt i dhurohet atyre që, me përvujtërinë e zemrës, janë të gatshëm për një shpallje të tillë. Dhe mos kini frikë: Jezusi, Shpëtimtari i botës, është me ne gjithmonë, deri në të sosur të botës (krh. Mt 28,20)!

Kjo thirrje, që ia drejtoj të rinjve të mbarë botës, merr një kuptim të veçantë për ju, të dashur të rinj të Amerikës së Jugut! Ju e përbëni shumicën e popullsisë, përfaqësoni një forcë të rëndësishme dhe të çmuar për Kishën dhe për shoqërinë në kontinentin tuaj. Jini, pra, ju misionarët e parë dhe kalojani bashkëmoshatarëve tuaj të botës mbarë entuziazmin e fesë tuaj!

Virgjëra Mari, Ylli i Ungjillëzimit të Ri, e thirrur edhe me titujt e Zojës së Aparecidas dhe Zojës së Guadalupe, e shoqëroftë secilin prej jush në misionin e dëshmitarit të dashurisë së Hyjit. Të gjithëve, me një dashuri të veçantë, ju jap Bekimin tim Apostolik.

VULLNETARE E RADIO MARISË - PËRGJIGJE DASHURIE

*Sprovoni e shihni sa i mirë është Zoti!
I lumi ai që shpreson në të! (Ps 34,9)*

Në një mënyrë të veçantë, që vetëm Ai di ta bëjë, Zoti më solli deri në njohjen me Radion. Gjithçka filloi si dëgjuese e radios, e më pas edhe si telefonuese. Por, si gjithmonë, planet e njerëzve nuk janë planet e Zotit. Kështu, Ai vetë deshë që unë të jem pjesë e Radios në një mënyrë të re.

Menjëherë pas hapjes së studios së Radio Marisë në Lezhë, më 25 mars 2011, u bëra vullnetare e radios. Brenda pak kohësh, Zoti më frymëzoi me idenë e një emisioni, të cilin edhe duhej ta drejtoja vetë. Është pikërisht emisioni “Së bashku me Krishtin në jetë”, i cili transmetohet prej mëse një viti tashmë, që nga data 9 janar 2012. Gjatë këtij viti Zoti më dha shumë. Por këtë “shumë” duhej t'ua jepja të tjerëve gjithnjë e më tepër.

Përvoja ime me Radion është diçka e mrekullueshme. Zoti ishte Ai, që përmes kësaj

vepre, më bëri të kuptoj se kur punojmë për Atë, nuk e humbasim kohën, por e fitojmë. E vërtetë kjo, se me gjithë angazhimet e jetës së përditshme, sidomos ato të shkollës, Zoti e gjeti edhe kohën për t'ia kushtuar Atij. E kjo nuk më pengoi aspak, madje m'u duk sikur tashmë kisha më tepër kohë për gjithçka.

Gjatë një viti, kemi folur mbi fenë tonë, në formën e një katekizmi të vogël me pyetje dhe përgjigje, duke i trajtuar temat që nga fillimi. Kemi folur për hapat e parë të krijimit të botës, për kryerjen mëkatit, për faljen, për urdhërimet e Hyjit dhe për hirin që Zoti na e ka dhuruar. Janë transmetuar gjithsej 45 emisione, ndër të cilat, 5 janë zhvilluar në praninë e të ftuarve, të cilët kanë qenë dëgjuesit dhe telefonuesit më të rregullt të emisionit tonë. Përveç mësimëve, kemi pasur mjaft momente argëtuese me të ftuarit në



studio dhe lojëra të ndryshme. Zoti dhuron me begati dhe ne e ndajmë me të tjerët gjithçka që e marrim prej Tij. Gjithçka ecën përpara dhe jo për meritat tona, por për meritat e Zotit tonë Jezu Krishtit! Atij i qoftë lavdia në shekuj të shekujve! Amen!

Elsa Sokoli

PËRURIMI I RADIO MARISË NË KOSOVË

Lajmëtari i Radio Marisë
është organ i
Shoqatës Radio Maria.

Tiranë

Rr. Papa Gjon Pali II, Nr. 4
Fushë Kërçik, Babrru, Paskuqan
Tiranë, Shqipëri
+355 4 2 346 346

Shkodër

Sheshi Papa Gjon Pali II
Shkodër, Shqipëri
+355 22 24 08 52

Lezhë

Sheshi Besëlidhja
Lezhë, Shqipëri
+355 215 24 970

E-mail: info@alb.radiomaria.org

Facebook: Radio Maria Albania

Përgjegjës: Don Prekë Lazraj

Më 29 janar 12013 në ambientet e Kishës së famullisë së Shën Ndout në Prishtinë, Imzot Dodë Gjergji e bekoj Studion e re të Radio Marisë në Kosovë. Në Meshën e shenjtë të cilën e kremtoi Imzot Dodë Gjergji, ipeshkëv i Administraturës Apostolike të Prizrenit, shin të pranishëm, shumë besimtarë, meshtarë, rregulltarë dhe rregulltare nga Kosova dhe nga Shqipëria. Morën pjesë edhe Presidenti i Familjes botërore të Radio Marisë, Zotëri Emanuele Ferrario, Koordinatori i Familjes botërore të Radio Marisë, Zotëri Bernhard Mitterutzner. Nga Shqipëria mori pjesë drejtori i Radio Marisë Shqiptare Don Prekë Lazraj, Presidentja z. File Preka me punëtorët dhe vullnetarët e brendshëm të Radio Marisë Shqiptare nga Shkodra, Lezha dhe Tirana.

Përshtypje të madhe, në të gjithë të pranishmit la prania e shumë të rinjve dhe të rejave që atë ditë jave e kishin mbushur përplot Kishën e Shën Ndout në Prishtinë. Çdo gjë ishte përgatitur mirë për të filluar hapat e parë të këtij mjeti të informimit në Kosovë. Motrat Bijat e Dashurisë së Krishterë kishin përgatitur me kujdes lutjen e Rruzares së shenjtë në të cilën në mistere paraqitej e ardhmja e jetës së Radio Marisë në Kosovë. Vullnetarët e Radio Marisë Shqiptare, Emiliano Plali dhe Izabela Marku, me një recital, paraqiten udhën e Radio Marisë në popullin shqiptar në gjurmët e Imzot Pjetër Bogdanit, nën mbrojtjen e fuqishme të Nënës së Këshillit të mirë, Nënë Terezës dhe Shërbëtorëve të Hyjit. Kori Emanuel më këngën e pëlqyeshme na e dhuroj kënaqësinë e afrimit tonë tek Hyji.

Duke ia besuar kujdesit të Nënës sonë qiellore dhe punës së vyeshme të besimtarëve të Administraturës Apostolike të Prizrenit, meshtarëve dhe të gjithë njerëzve vullnet mirë, Radio Marisë në Kosovë i urojmë bekimin dhe praninë e Zotit në krejt veprimtarinë që do ta bëj në emër të Zotit.

Radio Marinë mund ta ndihmoni përmes Bankave:**RAIFFEISEN BANK**

LLOGARIA NË LEK 0000584625

IBAN: AL77202110130000000000584625

BANKA CREDINS

LLOGARIA NË LEK 0000424721

IBAN: AL41212110160000000000424721

BANKA KOMBËTARE TREGTARE - BKT

LLOGARIA NË LEK 402633875

IBAN: AL4920511021633875CLTJCLALLD

NBG BANK

LLOGARIA NË LEK 31371010000013

IBAN: AL84901111230031371010000013

UNION BANK

LLOGARIA NË LEK 112360429020117

Radio Maria,
Hiri i Hyjit në shtëpinë tënde,
mund të dëgjohet në:

Rrëshen e rrethina

FM 100.7 MHz

Tiranë, Durrës, Kavajë, Berat

FM 91.4 MHz

Shkodër, Podgoricë, Ulqin

FM 102.2 MHz

Lezhë, Laç të Kurbinut, Mamurras

FM 89.6 MHz

Pukë, Fushë Arrëz, Tropojë,

Kukës dhe Kosovë

FM 90.0 MHz

në internet

www.radiomaria.al

PRO CREDIT BANK

LLOGARIA NË EURO 600388970102

Kodi SWIFT: FEFAALFR

IBAN: AL45209516090000600388970102

LLOGARIA NË LEK 600388970001

Kodi SWIFT: FEFAALFR

IBAN: AL56209516090000600388970001

INTESA SANPAOLO BANK

LLOGARIA NË EURO 1043631803

Kodi SWIFT: USALALTR

IBAN: AL25208110080000001043631803

LLOGARIA NË LEK 1043631801

Kodi SWIFT: USALALTR

IBAN: AL 79208110080000001043631801

NË ZVICËR

Në bankën **CREDIT SUISSE**

LLOGARIA NË CHF 361173-10-1

IBAN: CH1804835036117310001

Në bankën **KANTONALBANK**

LLOGARIA NË Nr. 90-105-8

IBAN: CH8600763000115724145